

Syarak Mangato Adaik Mamakai (8)

Contributed by Dr. H. K. Suheimi
 Friday, 18 January 2008
 Last Updated Friday, 18 January 2008

Allahu Akbar.

Kaum Fukaha mangatoka "Kahirunnas Maiyan Fa’unnas" aratinyo sabaik-baiknyo manusia adolah nan bamanfaat bagi manusia nan lain. Mukasudnyo iyolah kahadiran kito dalam masyarakat handaknyo jadi sitawa sidingin, mamberikan katantraman, mambaok barakaik nan bak umpamo payauang panji mamberikan palindungan dalam bataduah dek paneh jo ka hujan budi nan rancak.

Kok kusiuk sato manyalasiakan
 Tibo karuah sato mampajaniah
 Parang pucuak sangketo labiah nan senjang diluruskan
 Walau basilang karih di lihia, baliak bajimba baji makan
 Nan bana disabuikkan juo

“Ulil Haq walau kana mul rat” katoka nan bana walaupun pahit. Sabaliaknyo urang nan paliang cilako adolah urang nan manjadi silang kareh, kacang miang dalam nagari. Resah masyarakaik dek lakunyo, kambang maksiat dek ulahnyo, batabua fitnah dek muluiknyo, sahinggo kok mati sujuid syukur urang batapuak bakuliliang, batu mejan nyo di ludahi kudian masuk narako.

Bagitu Islam mangenalkan “Akhlakul Kharimah” budi nan baiak baso awaknyo. Iko suatu mato rantai nan mampatamukan antaro adat jo Islam itu ciek, nan kaduo, faktor nan manjadi rauh panghubuang antara syarak jo adat adolah adonyo parsamaan pandangan tantang perananan akal jo pikiran dalam kahidupan untuak mamilih antara baiak jo buruak.

Adat minangkabau mandidiak urang Minangkabau dalam mampagunokan akal jo pikiran, kunyah-kunyah sabalum dilulua, gamah-gama sabalum di paciak, usah satu duduak satu maunjua, satu tagak satu balari, dulu patuih tagak dari kilek, mukasuik inyo iyolah barang sesuatu hendaklah dipikia masak-masak sabalum mahanguak atau manggeleang, kok mamak mangatoka elok baa elok, elok dek mamak alun tantu elok dek kamanakan, pareso dulu lai kok bana nyo manahan bandiang, luruihnyo barantang banang, patah di makan siku-siku, di teliti dinalarkan dengan akal sehat, patuik alah mungkin baru sinan baiyokan , tapi kalau bukan itu nan disabuiknyo, tapi nan salah di banakan walau dari sia pun tarabik nyo musti di tulak matah-matah, indak ado istilah nrimo di kamus adat, sifat mblelo indak dikenal terhadap pambangkangan dari pangulu kalau inyo salah.

Disadur dari Kaset "Syarak Mangato Adat Mamakai" Karya Yus Dt. Perpatiah